



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 8

Gari lenmang engineering tai ajanga
lendong kanga ataloker: Gadkari

IND vs SA: Rohit aser Rahul na
lenisüba nung India team asayatsü

VOL. XXI NO. 57 (ADOK 57) DIMAPUR

TENTONÜ (MONDAY)

LUCHII (DECEMBER) 04, 2023


₹ 5.00

BJP-i state 3; Congress-i 1 nung takok angu

New Delhi, December 3, 2023 (Agencies): 2024 Lok Sabha electiong jakdang Bharatiya Janata Party (BJP)-i Chhattisgarh, Madhya Pradesh aser Rajasthan assembly elections nung takok nguogo. State asem rongnung ana nung Congress-i BJP tsüingdang tamakok takok tulu angu saka Telangana nungbo Congress-i K Chandrashekhar Rao'er Bharat Rashtra Samithi (BRS) madak takok ngutetogo. "Election results ajanga nübortemi BJP dak tamang akaba sayur. BJP-i sorkar ketdangsübaren tajung aser terenlok indang politics inyakba nung nübortemi tamang akar" ta Prime Minister Narendra

Modi-i state asem nung alirtem dang pelaba metetdaksü. "Onoki Janta Janardan tsüingdang apudaker aser party züingsemtemi meranga inyakba atema pelar" ta paisa ashi. "Nübortemi oshidang agütsüba agizüker saka BJP anema tangatetba indang tongpang maneni raratsü" ta Congress lennir Rahul Gandhi-ia ashi. Temalen agüja aliba state pezü den külemi Mizoram nunga assembly election agia liasü saka Election Commission-i Khristantem teimba ser aliba state nung Deobarnü votes mezüngi asüing (Hombar) votes azüingtsü anogo melenshiogo.

US Ambassador Garcetti-i Nagaland yaritsü mulunga lir



Eric Garcetti

"Ni North East-i kanga arunüa liasü kechiyong Myanmar nung Ambassador inyakdang North East ya alima senzüka yutsür ta ni angashi. Anungji tan yabo ni Arunachal Pradesh semdangdang Nagaland-ia arutsü mulungtet" ta paisa ashi.

Garcetti-i Kohima tashi atudang gari lenmang aser power supply nung temulung agütsütsüba ajitetba indang olen ka ashi.

Khonoma yimtsüing semdangi aodang lenmang tezülen jiro kanga nanga achiba indanga pai ashi.

Garcetti-isa Asia nung mezüngbuba green village nung loktii maparen inyakba atema tenüngsang agütsü.

Paisa Nagaland aser linük nung tanga tesemtem nung drug addiction aser tetsürtem ajungketba maparen inyaktsü jangraa bilemba lemsatet.

"Tarutsü nung sobaliba reprangi arutsüba masü saka kodaser US-i Naga nung alizüingtem aser taginübatem atema teyari agütsüsü ta asüba lemsatet arutsü yongyar" ta US Ambassador to India Eric Garcetti-isa ashi.

Iba mapang K Temjen Jamir-i US aser Nagaland tsüingda media & cultural exchange programme ka agitsüba den Green Energy indang tebilemba ka lemsatet aser idangji Ambassador Garcetti-i iba tebilemba mulunga agizük.

NDPP-i Tapi by-election nung takok angu



December 3, 2023 nü SDO (Civil) Hq. Rongsenmenla, NCS-i NDPP candidate Wangpang Konyak nem kulikaket agütsüba angur.

Dimapur, December 3, 2023 (TYO): Mon district kübok Tapi Assembly by-election nung Nationalist Democratic Progressive Party (NDPP) candidate Wangpang Konyak-i takok nguogo.

August 28, 2023 nü NDPP MLA Noke Wangnao asüba ajanga iba assembly menden tazüing aküm.

November 7 nü polling stations 23 nung by-election agi aser Deobarnep 8:00 ako nungi votes azüingtsü tenzüka liasü.

Idangji NDPP candidate Wangpang-i Congress candidate Wanglem Konyak madak votes aikati takok angu.

"43 Tapi Assembly by-election nung valid votes 14,737 liasü" ta SDO (Civil) Hq aser 43 Tapi A/C Returning Officer Rongsenmenla, NCS-i ashi.

"Iba nungi INC candidate Wanglem-i votes 4720 aser NDPP candidate Wangpang-i votes 10,053 ngua NDPP-i votes 5333 agi takok angu" ta Rongsenmenla-isa ashi.

Arunachal CM Khandu-i Naga Chef Stall semdang

Kohima, December 3, 2023 (DIPR): Arunachal Pradesh Pema Khandu-i Deobarnü Naga Heritage Village Kisama nung Naga Chef stall semdanga liasü.

Minister Jacob Zhimomi, Advisor Hekani Jakhalu aser tangartemi meina Pema Khandu-i Naga nung chiyungtsü balala chidanga senzü.

Iba mapang Advisor to Chief Minister Nagaland Abu Metha-i Naga Chef founders Alezo Kense aser Kevitsu Doze na nem tenüngsang agütsü.

Metha-isa Chief Minister Khandu dang pusema nungitba den sentong nung arua shilem agiba atema pelaba metetdaksü.

Naga Chef ya Nagaland nung achiajem tetoktepba ka lir aser iba ya Nagaland nung chiyungtsü balala metetdaksütsü aser sapudaksütsü atema ayongzüka agir. Iba sentong ajanga Naga chefs-i alima dang Naga nung chiyungtsü tapu balala sayutsü maongka angur.

Naga Chef tetoktepba osang ya December 9, 2023 nü metetdaksütsü.

Kohima, December 3, 2023 (TYO): America-i shisaliok, rongsenketzüng, sobaliba, saisapong aser temang anema alibaren ajanga Nagaland yaritsü mulunga lir ta Ambassador of USA to India Eric Garcetti-i ashi.

Garcetti-i tang mezüng atema Hornbill Festival nung adentsü atema arua lir aser pai osangbener den jembidang iba olen ashi.

"Ni Nagaland kanga sakloka kümogo. Ni tang mezüng atema North East semdang aser sobaliba o nübortem ajanga ni puaogo" ta pai ashi.

Pa taküm piyong nung benjung tajungtiba nung adenbaji Hornbill festival ya lir ta Garcetti-isa ashi.

US Ambassador-i Hornbill

Festival lapokba sentong nung tetushi tejaoker la ama shilem agia liasü. "Ni tesentaktep meteta aküm aser taruba hopta US-i lisapur kintem Hornbill Festival-i anir arutsü aser iba ya US-India-Nagaland sobaliba aser nübortem sendakteptsü atema lir" ta pai ashi.

America-i Nagaland nung physical aser human infrastructure nung yaritepa Naga-US tesentaktep yanglunür, ta Garcetti-isa metetdaksü.

"Human infrastructure nung job skills & training, hospitality & tourism amala aser physical infrastructures nung power sector, technology, textiles & agro business nung temulung agütsütsü" ta paisa ashi.

Hornbill Festival 2023: Nisungtemi Cultural Connect sapua repranger

Kohima, December 3, 2023 (TYO): Naga Heritage Village Kisama nung tanü agi anogo tasembuba Hornbill Festival nung Cultural Connect sentong agiogo.

Department of Art and Culture Department kübok Nagaland nung kin 18 dena lir aser kin balalai anepdang 10:00 nungi anüingdang 12:00 ako aser nikongdang 1:00 ako nungi 3:00 ako tashi shilem ana lemsar sobaliba sentongtem agir.

Kin 18 ji Angami, Ao, Chakhesang, Chang, Khiamniungan, Konyak, Lotha, Phom, Pochury, Rengma, Sangtam, Sumi, Tikhir, Yimkihung, Zeliang, Garo, Kachari aser Kuki lir.

Tanep sobaliba sentong nung Angami - Sovi Kehu (folk dance), Chang - Chishok Lamshok (peace treaty song), Garo (Jaktong Sika (traditional games), Ao - Yimdongsü Tsüingsang (dance), Tikhir - Milak (traditional method of making



fire), Chakhesang - Ridü (War dance), Kuki - Kangchaong Kap (top game) & Pasa Kichep (male games), Konyak - Sanhphat Shon (harvest dance) aser Khiamniungan - Ih-Yoh (returning from war) shilemtem agia liasü.

Tanep agiba sentong nung Ao aser Chakhesang sobaliba tsüingsangertemi tereprangertem kanga jangratemdakja liasü.

Tanü nikongdang agiba sentong nung Lotha - Woro

Jurhe O.. Jurhe (dance), Phom - Vidak Pangpho (the weavers' song), Pochury - Khape Lüpe (indigenous game), Rengma - Keshentüghü (first seed sowing ritual), Sangtam - Athrongrü Nyichi (warrior dance), Sumi - Aghache Le (the great hornbill song), Kachari - Chortrolee (folk dance), Yimkihung - Humpü Jiru Pfu Thsile (One leg dance game) aser Zeliang - Ih Ngau Merai Lim (Hornbill dance) shilemtem agia liasü.

"My Handloom My Pride"

**NAGALAND HANDLOOM & HANDICRAFTS
DEVELOPMENT CORPORATION LTD**
(A Govt. of Nagaland Undertaking)
Dimapur : Nagaland



Cordially invites you to the

STATE HANDLOOM EXPO

To be inaugurated by :

SHRI KUKO MERO, NCS
DEPUTY COMMISSIONER,
PHEK : NAGALAND

On 5th December 2023 at 11:00 A.M
At Town Hall, Phek Town, Nagaland

Sponsored by :
Office of the Development Commissioner (Handlooms),
Ministry of Textiles, Govt. of India, New Delhi

R.S.V.P
03862-224591
M:8730071176

Vitsutho Nyuthe
Managing Director

Naga Heritage Village nung sobaliba ayak balala sayu



Ao Cultural Troupe-i Yimdongsü tsüngsang sayuba noksa.

Dimapur, Luchii/December 03 (TYO): Naga Heritage Village, Kisama nung Hornbill Festival 2023 tenzüker anogo tasembuba, December 3, 2023 nü kin balalai pei sobaliba dak sendakba kenten-menü aser tsüngsang amala agi shilem agia liasü.

Anepdang sentong nung tongti tesemdang ama Lt. Gen PC Nair, PVSM, AVSM, YSM aden aser kasa sentong nung Host aser Co-Host ama Nagaland Legislative Assembly indang Speaker, Sharingain Longkumer aser Advisor, Agriculture, Mhathung Yanthan dena liasü.

Lt/. Gen PC Nair-i iba sentong nung jembidang Nagaland nung kin balala sobaliba nung asem atemba aser washitepba nung temolung asüba lemsatepa liasü.

Nagaland nung tesunep aser

yimchiyimjung alitsü asoshi Assam Rifles temi bendanga agütsür inyaker, ta pai ashi.

Medical aser engineering nung national-level competitive exam tem asoshi meta talang nungi kaketshir 32 nem training agütsüba densema Lt. Gen PC Nair-i Assam Rifles temi mapa tajung inyakba ashi.

Iba sentong nung Angami, Chang, Garo, Ao, Tikhir, Chakhesang, Kuki, Konyak, aser Khiamnungan kin tem tenüng nung cultural troupes temi akhi tetsü-tebou tsüngsang aser ken agi shilem agia liasü.

Tongtipang nisungtem pela agizükba sülen washitepa aser Khonoma Village indang head GB, Vilazosie Punyü-i sentong moaja liasü.

Nikongdang sentong nung tongti tesemdang ama Arunachal Pradesh indang Chief Minister, Pema Khandu

aden asr iba sentong nung Host aser Co-Host ya Minister, Public Health Engineering & Cooperation, Jacob Zhimomi aser Advisor, Printong & Stationary, Kropol Vitsu liasü.

Iba sentong nung tesemdang tongtitem ama Arunachal Pradesh Legislative Assembly Speaker, Passang D Sona; General Manager North Frontier Railways, Dr. Chetan Kumar Shrivastava; Northeast Frontier Railway, DRM Prem Ranjan Kumar; Alexandro; Adani Group nungi Capt. Raghu aser Baichung Bhutia nungertem dena liasü.

Nikongdang sentong nung Lotha, Phom, Pochury, Rengma, Sangtam, Sumi, Kachari, Yimkhiung aser Zeliang kin nungi cultural troupes temi tetsü-tebou ken aser tsüngsang agi shilem agia liasü.

Kisama Heritage Village nung IRCS ajanga medical service angati agütsür

Dimapur, Luchii/December 03 (TYO): Kisama Heritage Village nung tang Hornbill Festival alidang Indian Red Cross Society, Nagaland State Branch ajanga medical service

angati agütsür. Iba benjongmung nung adenertem timtem majurui temang anema yutsütsü mechi volunteers temi ammang-sangwa metitemi inyaker.

Parnoki medical teyari agütsüba den külemi ambulance services-a agütsü, koba ajungben rongdak mapang timtemertem angati anir senzütsü asoshi Kiosk nung yua lir.

Clark Theological College ajanga tenüngsang agütsü Dimapur, Luchii/December 03 (TYO): Akangtemsü Yaden, M.Th. (Christian Theology) aser Senaienla, B.D. nati pei shisaliok nung kanga meranga bushiba agi takok tulu ngua Clark Theological College nem tenüng tajung bener arutsüba asoshi kanga pelaba lemsateper, ta CTC principal, Prof. Rev. Dr. A. Temjen Jamir ajanga sangdong ka nung ashi.

Kerala United Theological Seminary, Thiruvananthapuram (Trivandrum), Kerala nung November 25, 2023 nü 98 buba Senate of Serampore College (University) Convocation

akatang Akangtemsü Yaden-i Master's Prize (M.Th.) for Overall Highest Grade sempet angu aser Senaienla-i Rev. C. C. Pande Memorial Prize in B.D. for Overall Highest Grade, Union Biblical Seminary Prize in B.D. for the Highest Grade in New Testament aser Senate Prize in Biblical Studies (B.D.): New Testament sempettem ngua liasü.

Tarutsü nunga Tsügreim yimli aser Pa sentsüwangshi asoshi parnoki merangba ajak nung teti moajangma, ta sangdong ajangasa ashi.

Mkg. nung mata mabensartem anogo sentong agi



Kr.Bendangrenla S.Longkumer, Asstt. Prof. Dept. of English, FAC

Mokokchung, December/ Luchii 03 (TYO): Alima ajanga den külemi Ungma yimtak Yimtsüngta Arok Sapang nung Alima Ajanga Mata Mabensar Anogo (International Day of Person with Disabilities) sentong "United in Action to Rescue and Achieve the Sustainable Development Goals for, with and by person with Disabilities" omen nung ajemdaker agiogo.

Tanü iba sentong nung Kr. Bendangrenla S.Longkumer, Asstt. Prof. Dept. of English, Fazl Ali College ajanga yimden, arogo, lokti aser kakat reju nung parnok tangar memeneper mata mabensartem ya kanga dang anepalutsüla, ta ashi.

Mata mabensartem aika dak sempet tajung jenti keta lir, anungji parnoki iba sempetji amshitetsüsa lenmang lapoktsütsüla, ta ashi.

Lokti mungdang balala akaba mapang nung parnok mata mabensartem mesentoktsü aser parnok anepalutsü asoshi mungdangdi pangzüng tajung ka yanglutsü

kanga dang nungtakerta tongti o jembirisa ashi.

Laisa Tsüngremi nisung ajak kanga dang tobur junga Pa mesükba nung yanglu, nenoki aiben nenok sasa temelung ajema tasü meiti bilemer saka iba nungjagi pongteta adoker nenok dak aketba sempetji amshia nenok takum ajanga T s ü n g r e m sentsüwangshidakangta adenshia aliba mata mabensartem ajungshia jemb.

Kasa sentong nung Ao Baptist Arogo Mungdang Executive Secretary Rev.Dr.Mar Pongener, Wt.Arenlila Jamir Project Associate, Caritas India, Village Council Ungma, District Administration aser mata mabensar tsürabur tenung nung aser telok tenung nung aser kija balalai jembiba den Mulung Imsong aser Mata Mabensartem rongnungi Kr.Katibenla tenati ken ka ka tena shilem tajung agia liasü. Mezüng iba sentong temer kelen ano mata mabensartem sempet salaba sentong tajung agia longso tepa liasü.

Kisama nung Canon ajanga photography workshop ayongzük

Dimapur, Luchii/December 03 (TYO): Kisama nung aliba HIP Fest Gallery nung December 3, 2023 nü Canon ajanga advanced photography indang shisatsü aser mirrorless technology amshiba tajangzük lemsatepa liasü.

Iba sentong nung mirrorless technology indang technical yimyatem, tayongzükbatem aser shilem agirtem den Q&A session agia liasü.

Iba workshop nung Canon camera tem indang, mirrorless technology, DSLR tajungba kuma yangluba indang jembia liasü.

Shilem agirtemi camera,

photography fundamentals aser mirrorless technologies tasenba indang asüngdanga liasü.

Canon team nungi iba workshop nung Subhajit, Senior Territory Manager; Aninod Basu, Mentor; aser Bhandeep Khound, Sales Support Officer nungter temi shilem agia liasü.

Iba sentong ya Canon, Portrait Studio, aser Department of Information and Public Relations (DIPR) lungjemer ayongzükba liasü, kong Photography Club Kohima, photography janngartem, freelance photographers, HIP Fest züngsentem dena liasü.



24TH Hornbill Festival 2023
DAY 4
MORNING - 10:00 AM

HOST
 SHRI. S. KEOSHU YIMCHUNGER
 ADVISOR
 YOUTH RESOURCES AND SPORTS

CO-HOST
 SHRI. BENEI M. LAMTHIU
 MLA

CHIEF GUEST
 SHRI. ANSHUMAN SINGHANIA
 MD JK TYRES

HONOURED GUEST
 I. MR. SANTOSH KUMAR
 EXECUTIVE DIRECTOR (RETAIL)
 II. MR. SANJEEB PAUL
 EXECUTIVE DIRECTOR (ENGINEERING & PROJECTS)
 III. MR. DINABANDHU MANDAL
 EXECUTIVE DIRECTOR (OPERATIONS & LOGISTICS)

TRIBAL GUEST
 WAITSÜNGBA WALLING
 AO

AFTERNOON - 1:00 PM

HOST
 SHRI. K. G. KENYE
 MINISTER
 POWER, PARLIAMENTARY AFFAIRS

CO HOST
 SHRI. KAZHETO KINIMI
 ADVISOR
 ANIMAL HUSBANDRY & VETERINARY SCIENCES
 SHRI. DR. NEISATUO MERO
 MLA

CHIEF GUEST
 SMTI. SUSHMITA DEV
 MP RAJYA SABHA

GUEST OF HONOUR
 SHRI. BAICHUNG BHUTIA

SCAN FOR HORNBILL SCHEDULE



PM Modi lenisüba kübok north India nung BJP junga yangertetogo



Jaipur, December 03, 2023: Rajasthan Assembly elections nung BJP-i takok anguba sülen Jaipur nung party nung inyakertem aser pusemertem pelatepdang tangokba noksa nung angur.

New Delhi, December 03 Nadu na nung BJP jenjang (Agencies): Tawa state pezü nung assembly election agiba osang Amongnü sangdongogo; BJP-i Rajasthan, Madhya Pradesh aser Chhattisgarh state tem nung takok angu aser Telangana nung Congress-i takok nguogo.

Ato kilonser, Narendra Modi lenisüba kübok north India nung BJP kanga junga yangertetogo aser tang Congress party-i Telangana nung takok anguba ajanga south India tsütsü Congress jenjang ano tajungba kümogo.

Tang north India nung state 12 nung BJP sorkar lir, ajsüiaka south India nungbo BJP tera meyangteter. Taküm Karnataka nung Congress-i BJP sorkar atsüngdoka liasü aser south India nungsa Kerala aser Tamil Nadu na nung BJP jenjang mejunji lir. Telangana assembly election nung Congress-i takok anguyonga BJP-ia taoba mapang dang nungi menden teimba nung takok nguogo. 2018 küm Telangana election nung BJP-i menden ka nung dang takok ngua liasü saka tawa agiba election nungbo parnoki menden 11 tashi nung takok nguogo. Tang India nung national party trok - BJP, Congress, Bahujan Samaj Party (BSP), CPI(M), National People's Party (NPP) aser AAP party tem lir. 2024 küm Sikkim, Arunachal Pradesh, Odisha aser Andhra Pradesh state tem nunga assembly elections agiba den külemi küm tetenzüklen Lok Sabha election agitsü.

December 5 nü cyclone 'Michaung' agi Andhra Pradesh kongshitsü

New Delhi, December 03 Indian Meteorological Department (IMD)-i, Bay of Bengal nung tentetba mopung tesashi kati Cyclonic Storm 'Michaung' kümogo aser December 5 nü iba cyclone ajanga South Andhra Pradesh tsüingda kongshitsü, ta metetdaksüogo.

IMD-isa, cyclone süiba mapang nung mopungji ghonda ka nung kilometer 80-90 nungi kilometer 100 tashi tekara asütsü, ta metetdaksü. Iba tensa dak sendakba nung Amongnü Ato kilonser, Narendra Modi-i phone ajanga Andhra Pradesh Chief Minister, Y S Jagan Mohan Reddy den tongtepratepa Cyclone Michaung atema terenemshiba osang

metetpelaba den külemi Centre sorkari yaritsü, ta metetdaksüogo. 'Michaung' nungja ya Myanmar linüki jatsü, koba tetezü tashi lir. Tang iba cyclone ya Puducherry nungi kilometer 300 shi pilar lir aser maneni northwest tsütsüleni oa westcentral Bay of Bengal atongtsü aser December 4 anüngdang south Andhra Pradesh aser north Tamil Nadu tzüyikümlen atongtsü.

December 5 anüngdang iba cyclone ya Andhra Pradesh tzüyikümlen Nellore aser Machilipatnam tsüingda tzüyiküm atongtsü, ta asadangtetogo. Iba cyclone ajanga southern Odisha aser tzüyikümlen tesem aika nung tzüinglu sashia arutsü. Odisha yimtiba,

Bhubaneswar nung aliba Regional Meteorological Centre-i, taruba anogo asem tashi Odisha tesem aika nung tzüinglu arutsü, ta metetdaksüogo. Iba cyclone süitsü aliba dak sendakba nung state sorkari tzüyikümlen aser south tsütsü aliba district collector tem dang renemshia alitsü metetdaksüba den külemi Agri department nung inyakertem shinga sodi magitsü metetdaksüogo.

Iba dak alia angopurtem dang December 5 tashi tzüyimi angopui maotsü tekümdangtsü metetdaksü, kechiyong tzüyim nung tzüsem tulu alitsü. December 4 nungi Odisha tzüyikümlen mopung ghonda ka nung kilometer 35-45 kera aontsü aser December 5 nungi ghonda ka nung kilometer 60 tashi kera aontsü.

Gari lenmang engineering tai ajanga lendong kanga ataloker: Gadkari

New Delhi, December 03 India nung küm shia gari lendong lakh 5 dak tema ataloker, aser lendong atalokba kuliji teimbaka gari lenmang engineering tai agi lir, ta Amongnü Road Transport & Highways Union Minister, Nitin Gadkari-i metetdaksü.

Union Minister-isa engineer tem dang taküm kümzüksü atema 'black spots' (lendong kanga bulua atalokba tesemtem nung aliba temaitsütem) agientsüsa gari lenmang yanglutsüla, ta mepishia metetdaksü.

82buba Indian Roads Congress senden nung jembidang minister-i, tanga oset amshiba den technology tasentiba amshiba ajanga sen teindokba ajemtsüla saka gari lenmang junga yanglutsüla, iba denji külemi mapang shidak nung projects renemtsüla, ta metetdaksü.

Paisa, "India nung küm shia gari lenmang nung lendong lakh 5 dak tema ataloker aser item lendong nung nisung lakh 1.5 asür aser lakh 3 yirur. Ibaji ajanga linük GDP nung shilem 3 takoksa angur. Tenla agütsüba san ama gari lendong atalokba ajak atema gari anir nem tai tongloksür. Ni iba ya jungjunga repranga dang atar- aiben gari lendong ya gari lenmang engineering tai ajanga lir," ta metetdaksü. "Ni-a gari lendong ajurua teret pezü sükdanga liasü. Nisung aika asür. Gari lendong nung asürtem shilem 60 bo arrshi küm 18 nungi 34 tsüingdapurtem lir, aser parnok teimbaka engineer aser doctor tem lir. Ibaji linük atema junger asü? Engineer tem ama nenoki 'black spots' agientsüsa inyaktsü asü? Engineering tai ajanga gari lendong atalokba nokdangtsüsa inyaktsü ni nenok dang mepishir," ta union minister-i metetdaksü. Minister-isa engineer tem dang gari lenmang tajungtiba nung yanglutsü aser detailed project reports (DPR) renema agütsütsü metetdaksü. Ano tanga olen ka nung minister-i, tzü-mopung wazüka ayutsü atema National Highways Authority of India (NHAI)-i süngdong 78,000 tesem melenshia temogo, ta metetdaksü. Kasa sentong nung jembidang Gujarat Chief Minister, Bhupendra Patel-i, state sorkari taküm budget nung road construction department nem sen crore 20,600 lezmüksüogo, ta metetdakja liasü.



December 03, 2023 nü Patna nung India nung mezüngbuba Tir, Rajendra Prasad asoba anogomong nung pa indang kürakyanglu matsüngdang kaketshirtemi pa nem akhüm agütsüandang tangokba noksa nung angur.



TIR YIMYIM YIMOBILEM (EDITORIAL)

DIMAPUR

TENTONÜ

LUCHII 04, 2023

ECI-i Naga Khristantem dak mamanger

Election Commission of India (ECI)-i tawa assembly election agiba state 5 nung vote azüngtsü asoshi December 3 amongnü latettsüba ama Mizoram dak alaka tanga state pezüprongla nung züngogo. Atangji, Khristan masüba purtem asoshi amongnüji kecha balaka masü, tanga anogo den kasa, mapa inyaknüra inyaksü, meinyaknüra meinyaksü. Ajisüaka, Khristan purtem asoshibo amongnü ya tanga anogotem dang nungi kenyongi balaka, ibai anogo trok nü prongla pei taküm nüngdak asoshi mapa inyaker anisüngzüka Tsüngrem külemba mung, anungji temeshi anogo ta züngshir. Ibaji Laishibai sayuba. Ibayongji, Khristan purtembo amongnü aluia maor, dokan lapoka meshishir, office-tema sodi asür aser nisung shinga aintsüinlenia moi sentep kidang yimkong adenshia Tsüngrem külema amonger. Iba kuli jagi Nagaland aser Mizoram nung alir Khristan purtemi Election Commission of India dang amongnübo vote mazüngtsü asoshi mepishia liasü. Aji oda, mepishiba ama ECI-i angateta Mizoram nungbo December 3 Amungnü melena December 4 Tentonüang voteji azüngtsü asoshi telemtetba agütsüogo. Aji oda, Mizoram nung vote azüngba anogo Amungnü agi Tentonü melenshiba kuli ECI-i agütsübaji tanga agi masü saka "Mizoram state ya Khristan purtem kanga agia teimba aliba state asüba agi," ta agüja lir. Tetezü ECI-i Nagaland yabo Khristan purtem teimba ser aliba state ka amato mangur asütsü. Aji, ECI asoshi masü saka asenok Naga Khristan-tem asoshi tebilemtsü aser tebilemdangtsü tulu lir. Atangji, Nagaland nung alir Khristan teloktemia ECI dangi Nagaland ya Khristan purtem kanga agia teimba aliba state asünungji Amungnüjibosa vote mazüngtsüla ta shidangogo südi saka temepishiba shiti ka agütsüba dak alaka kechisüdirsüaka Nagaland nungbo Amungnübo election-a magitsü aser vote-a mazüngtsü ta asüba tangatetba nung ajangajanga nokdakba tamanga mali asü südi aser mapaa mangu. Ibaji asenok Naga Khristan-tem, talisa asen Aor Khristan-tem, tenüng agi tema tazütsü Khristan asüba amai ECI dang Amungnü vote mazüngtsü ashijabaji kuli küpdok mapa ka dang asü südi. Atangji, tang ya ECI purtemji Nagaland-i arununga tenla kitem dak alaka Khristan purtembo ka danga mangutsüa akok. Akhidangbo, Naga Khristan-tem kar alibaji jangjajangjar asü, parnok jagi tetsüng agi osang tajung bener jaja. Item jagi Nagaland Khrista asoshi ta ayongzük aser mamangba purtem dangi osangtajung bener meyerijang ter yoktsü nangzük. Item jagi aonung agi anepdang küma sarasadempet sarasadem. Itemji tazüngba purtem masü, anarongdena pei oshi nung adoka akaba Laishiba züngtettertem liasü. Itemji ita sen maka aser akayonga teboka masüng, anungji aluyima Tsüngrem tenzükba mapa nung inyak. Parnok mapangjibo Amungnü ainlen jajaba aser alui aoba purtemjibo arogo nungi endok, kechiyong ibaji Laishibai memelaba ta parnok züngzünga angateta liasü. Item jagi yi tongpang ayongzük aser lanurtem taküm aika kümzük. Item denji tanü Nagaland nung aliba Khristan-tem medemdangra tezüngjanga malet, Amungnü asü akhinüar mejangja, Khristan-a memesük, Hindu nungertema memesük aser Muslim nungertema masü, kecha Tsüngrem daka mamanger asü mesüra tsüngrem ajak dak amanger ta asüngdangtsüsa telokang ka kümer angur. Joko, temekok agi ali nung apudaker sarasademtsüba tobo amadoker mendena tanük nung mennüba Khristan-tem, sentep kidangi tetsüng agi mera ka aotsüa maksü amai bilemba Khristantem, Delhi nungi yokba sen shitak mamshitetba Khristantem, tenüngsang angutsü asoshi dang tenla agütsüba Khristantem, Tsüngrem o sayutsü aser angatettsü jangraba Khristantem masü saka tenla ki tajungba yanglutsü toktepba Khristan-tem, Tsüngrem asoshi masü ita sen atema tenzükba Khristan-tem, item purtem dakji kodaser ECI-i temulung lemtettsü ? Ibayongji, ECI-i Nagaland nung Khristan aika lir ta asüba ya kenyongi mamanger südi. Asenok atema ano timtem lendong tulubaji yangji anendaka lir.

OLEMSABANG

Khrista asoba benjong yabo balaka

R. Nungshi Longkumer

Taküma (2023) asenoki yongyaa ataba Khrista asoba benjong anogo anasa arudaki. Mapang tadong nung Tsüngremi asenok ajak nem arishi anogo tajung den anema lia pelatepba amongtsüsa moatsütsü ta yimlaa sarasadema atadi. Oda küm tsüngda nung asen Naga lima kisüng nungasüng benjong tapu aika ajurua mongyonga arudaki. Hornbill benjong nungi tenzükter pei-pe sobaliba dak sendakba benjongtem monga arudaki. Item ajak dangji alima benjongtem ta ajar. Itemji menüngdak ta ashir masü, alima aka tashi itemji benshia aru aser ano benshia aotsü. Saka repranga aru nung item benjongtem nungjibo salepsari japupari aika dena angutsü. Oda asenok Khristan lima nung Khristantem alir asünung tetenzükdangbo Arogo tenzükter kar jar sarasadema tenzüktsü saka tetempangdangbo petsaperonga rongrongshironga senshitsü ta asüba tangatetba nung dang asenoki benjongtem mongyonga arudar.

Tenüng agibo sobaliba benjong ta jembir saka sobaliba dak maketba achi ajemba dak nungi tenzükter temenen mapatem kechisa lir tapu ajak benshia benjongtepba agi temoatsü benjong masü saka temenen benjongang kumdaktsüba aika ngua arudaki aser ajangshia arudaki. Saka Khristmas benjong yabo balaka lir. Alimai yimjung bentsür aruba anogo, nisuungtem rongnung meputep aliba nungi puteba kümdaktsüba anogo, tejashi agi tepela melentsüba anogo, shisabulu nungi tesunep melentsüba anogo, temenen talenba nungi salaa chioker nüji kumdaktsüba anogo,

molomi tekangshi nungi anitetter tepela Kodaki yokba anogo, tasü nungi taküm kümtsüba anogoji ibai lir. asenoki züzüa masü saka kanga dang akum tsüba asüngtetta aser kumdanga iba anogo ya kanga dang temoatsüba anogo ta agizüktettsübaji koda tongtipang. Alima benjongtembo pei-pe mapang balala nung mongyonga aor saka 25 th December anogo yabo alima ajangai alima kümtetdakba Khrista asoba anogo ta meteta lir aser nübur ajangai tematiba Tsüngrem nem tenüngsang tetushi agüja agizüka amonger . Oda December ita yabo Khristmas ita ta ajar anungji December ita mezüng anogo kodang ayoka ajemokdir asenok melungjang nung tepela ka agi melentsür. Iba den alima tatempang kulen nungi kulen tashi nung nüburtemi kongki tapu balala tema pelatepba tsüngsangtepba Khristmas yongyaba kentem adentang alima tammang tua makai kümdaktsür.

Kodaker lima mesüka nüburtem pelateba angudang küm shia iba anogo kodang ajurutsü ta yongyaseta adar. Oda iba anogo asoshi yimtsüngtem nung süshia jila balala tem sushia ano tesem balala nung arogo nung tenzükertemi sentong tajung renemer yongyaa atadang nür telok nunga nübur pelateptsüsa ano Tsüngrem mulung ajitsüsa renema lir südi? Sentongji kodaka tabensaba nung renemer kodaka meraketa mongdir patakaji Tsüngrem sentsüwangshi abensadaktsür ta metetti. Saka Khristmas benjong dak mapetba mapatembo kecha benoka mebenschitsü merangdi. Nisung karbo küm tepiyong sen bendena yur benjong mapang nung telok aika nung pa/la dener ak nashi tepseta pa chiyonglen dang senzüba purtem aika angutsü. Ibajibo tanelar benjong masü saka shi benjong ta ajar. Iba nungi anguba tajangzükji rongsen laluba mapang tajung, amajok nung indokba aser kibong telongi luldaktsüba den pei takum takoksa nung tempangba ta ajar, aser item mapajibo tamashi nisungi ang inyaker ashi nisungji-ibo meinyaker ta angatetti.

Anungji Khristmas bejong anogoji amajok temenen menaba nung masü saka temoatsü tulu anguba anogo asütsüsa asenok ajaki bilema lidi ta ayongzükter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Philippines nung tekülem tagidak mapang Khristan 4 pokset



December 03, 2023 nü Philippines kübok Marawi yimti nung aliba Mindanao State University nung Khristanem tekülem sentong tagidak mapang nung bomb apokba sülen ketdangsertemi lendong atalokba tesem nung bushisungdangba mapang tangokba noksa nung angur.

December 03, 2023: December 03, 2023 anepdang Philippines nung Khristanem tekülem sentong tagidak mapang nung bomb ka apokba lendong nung tetsür asem densema Khristan pezü asür aser 50 dak tema yirurogo, ta ketdangertem osang ka ajanga metetdaksü.

Muslim nütsüng teimba aliba Marawi yimti nung aliba Mindanao State University

nung tekülem sentong tagidak mapang bomb apokba ajanga kaketshirtem aser tesayurtem kanga tsübutepa liasü, ta campus security chief Taha Mandangan-i metetdaksü. Mandangan-i, iba ya kiralongra mapa lir, ta aitsü. Iba tatalokba sülen linük yimtiba, Manila aser Marawi yimti na nung security akangshiogo.

2017 küm Islamic kiralongrartemi Marawi yimti

ya ita pongu shi atsünga liasü. Lanao del Sur province yimtiba, Marawi nung iba lendong atalokba sülen Islamic State pusemer telok balala mita ao tenzükogo.

Philippine Tir, Ferdinand "Bongbong" Marcos Jr-i iba tatalokba ya bendanger kiralongrartem ajanga lir, ta shia iba tatalokba aitsü aser Defence Secretary, Gilberto Teodoro-i aibelenertem aputsü, ta metetdaksüogo.

Jharkhand state nung Khristan missionary pezü dak azük

December 03, 2023: Jharkhand nung Garhwa district kübok yimtsüng ka nung Hindu yimsü alia amanger telok kati Gospel Echoing Missionary Society (GEMS) nungi missionary pezü dak azük, ta osang ka ajanga metetdaksü.

Par pezü rongnung pastor ka aser pa kinüngtsü na densema liasü. Pastor P. Sarvanan aser P. Andrew na kanga mejungi yirur November 21 nungi tang tashi GEMS hospital nung mongdar.

Osangbener den jembidang Andrew-i, "Doctor temi künaprongla dak tekolak CT-Scan agiba sülen iba nungji ajemdaker treatment agidar," ta

metetdaksü. Arogo nung züngsem, Shanti-i sarasademtsü atema pastor Sarvanan lar kidangi jaoka liasü.

Arrshi küm 54, Sarvanan aser pa kinüngtsü, Rosy na den GEMS school nung administrative staff, Andrew aser pastor Sarvanan den teyariteper, Justin nunger gari ka nung November 15 nü nikonkdang 5:00 ako meta Shanti'er ki tonga ao.

Andrew-i, "Yimdak Hindi yimsü alia amangertem kari onok meyong gari angu, aser onok Khristanem ta metet, kechiyong gari nung Kangki ka keta lir. Parnoki onok sülen

anidak aser ki ajioka ayuba sülen tangar ayongsemtsü atema ao," ta metetdaksü.

Iba sülen nisung 40 shi yi agi meseper arua Shanti'er kima adenshia parnok ket nung Khristanemji agüjang ta takhangba agütsü, ajsüaka Shanti-i ki telung nungi shibanger ki melapoktsü, ta Andrew-i metetdaksü.

Lokti jagi Shanti dang kiji lapokjang mesüra onoki kidang mi senoktsütsü, ta amokmeren.

"Onoki tekong merangra tensa tamajungba akümtsü, ta meteta onoki kimai ayazüka alutsü telemtetba agia kimai alu," ta Andrew-i metetdaksü.

(Maneni tapak 8 nung...)



Dimapur Ao Baptist Arogo nung Christmas Yongya sentong December 03, Amungnü temoatsü sentep nung DABA nung theology zünger alir tetsürtemi ken atenba angur.



Dimapur Ao Baptist Arogo nung Christmas Yongya sentong nung DABA Ola teloki Christmas ken atenba noksa nung angur. (Dimapur, December 03, 2023).

ANOGO ABEN TSÜNGREM DEN

Ratamata tajanzük

Rom 15:1-7

Tangatetba tajungi nisung ka ain adokba sotter; aser aibelenka odang toktsübaji pa sentsüwangshi (A. Shin 19:11).

Laishiba nung ojang ana tejangja lenmang nung melentepa amshir. Mezüngbuba, timtem mapang nung meranga nokdaksü Tsüngremi tashi agütsür. Tanabuba oji taremsük: nisung tamajung den inyaksü Tsüngremi tashi agütsür. Kodang na tia tasak nung lidir, meranga tizüksü sarasademang. Kodang nisung tasak ajurudir, taremsük asoshi sarasademang.

Shisa taka nisungi aibelenji odang toktsür. Iba dang "tangar nem terataba tajanzük agütsüba" ta ajar. Aibelenba ajak metetta inyakba mapa ta agiba jagi yirudaksür, aremsükang. La /pa mapa obendangtsüba dang nungi, ne kiyonger tebilemba tajung sayutsü mapang agüjang.

Iba shin O temulung nung ayutsü tsüraburi junga inyaksüla. Aiben asen tanurtemi mapa tamajung inyaker. Tesülen aibelenji iba tashi mejungi liasü ta angatettsüba tang tsüraburi azüoker. Tanurtem dang taremsük sayutsü tim. Tsüngremi asenok dang talangka aremsüker ta bilemtettang. Asenok Pa chirtem lir. Asenok temenen Kibuba Yisu Khrista dak mebenloktsü tashi, Tsüngremi asenok dang aremsüka ali. Tsüngremer tazüokbaji teti kümdanga aser bilemdanga amshir. Pai asenok dang aremsüker aser tatok agütsüba temeim agi benshir.

Oba, onok dang kati dang aremsüksü sayuang; Yisu asoshi. Amen.

Nigeria nung Pastor ka kinüngtsü khaset



Oluwakemi Moses

gari nungji injang khaloktsü.

La den lar kinü tanur (arrshi ita ana) liasü.

Ondo state kübok Akure nung la asüpila sentong nung jembidang Pastor Moses-i, "Kechi atalokdir atalokaka ni Kibuba meimtsü. Khrista sür shia aruba ajanga mojing tamakok ngudaksüogo," ta ashi.

La kinüngtsü den tatem salem lemsatepa pastor-i, "Shia aruba anepdang majurutep tashi salem, tindang nisung. Ni na meimer, Oluwakemi. Anisüngzüka liang, kü meimla. Atangji na asen Kümtetdakba teku nung lir. Tanaben majurutep tashi salem," ta ashi.

Taraba aser Benue states kübok Wukari-Jootar federal highway nung sepa aser police checkpoint aika liaka ozüng alema inyakertemi mapang shia timtem agütsür, ta Taraba state nung alir aser Khristan, Emmanuel Yakubu-i metetdaksü.

Abuja, December 03, 2023 (Agencies): Taoba hopta Nigeria kübok Taraba state nung pastor ka kinüngtsü khasetba sülen Honibarnü (December 2) asüpila sentong agiogo.

Taraba state kübok Jalingo nung aliba Redeemed Christian Church of God (RCCG) nung pastor, Konye Timilehin Moses kinüngtsü, Oluwakemi Moses, Ondi state nungi jilai meyipa aruba mapang nung nokdangtsüla," ta paisa kiralongrartemi la mena aliba

"Item tatalokbatem nokdangtsü atema tangsa ketdangsertemi inyaksüla. Sepai aser police-i tekeratiba nung item tatalokba nokdangtsüla," ta paisa takhangba agütsü.

**AO OSHI ANGAZÜKDAK:
TANÜ ANGAZÜKTSÜBA OJANG**



Sensatsü

- (v) mezüngmeshia jembi (defame, disrespectful utterance)
- * Tenükmeremertemi takok angusang sensatsü.

Sensen

- (v) mopung temokong anepanepa aonba (cool breeze)
- * Lemiwa nisung ajaki mopung sensen dak kazüner.

OLONG PAITEP # 6633

1		2		3		4	
				5			
		6					
						7	
		8					
9							10
			11		12		
13							
14				15			

TIPIEN

- 1. Shimdang - (5)
- 3. Tatalokbatem - (5)
- 5. Tetenzük - (6)
- 6. Pei meyong aküm - (3)
- 7. Kilem nung atonger - (4)
- 8. Obalatem - (7)
- 9. Mekum nung _ _ _ _ - (4)
- 12. Nü den tambu - (3)
- 13. Saisapongertem - (6)
- 14. Sü agi yangluba lisü - (5)
- 15. Temadok - (5)

LANGTSÜNGLEN

- 1. Shiruru tebong masü - (5)
- 2. Ayazüa senzüba shiruru tila - (7)
- 3. Tajemetdak - (4)
- 4. Pei sasa ulua bilem - (6)
- 7. Sen tetong - (7)
- 8. Süngjang telong nung alir - (6)
- 10. Iba ya masü - (5)
- 11. Mamen - (4)

OLONG PAITEP # 6632 TELANGZÜBA


TIPIEN:

- 2. Orak, 4. Takang, 6. Jongdak,
- 8. Kok, 10. Temenen, 11. Alen,
- 12. Ila, 14. Süngden, 15. Tzüküm,
- 16. Omen.

LANGTSÜNGLEN:


- 1. Tangsem, 3. Atak, 4. Tejeminü,
- 5. Tekongnem, 7. Anünü,
- 9. Nangzük, 13. Asem.

NAI-A YA METETTER MA



Tasodang nungi tenük poker asortemi kodanga tangar menüba mengudang saka peladangbo koma menütsüar ibaji parnoki meteta dang lir.

Noksa nung meputepi aliba 3 bushiang



Nübortemi yaritepba ajanga UNLF den yimjung yanglu: CM Biren



Imphal, December 3, 2023

(Agencies): Manipur nung alirtemi yariba, amalitepa aser ajungmesoba ajanga November 29, 2023 nü peace agreement nung sign sütepogo ta Chief Minister N. Biren Singh-i ashi.

United National Liberation Front (UNLF)-i Centre aser Manipur state sorkartem den Peace Agreement nung sign sütepba sülen Kangla Fort, Imphal nung reception ceremony ka agidang CM Biren-i iba osang metetdaksü.

Iba reception ceremony nung UNLF telungpur kinungertem aden aser idangji Chief Minister Biren-i “meimchir takütem ya kanga senti lir aser asenoki taküm aika samaogo” ta ashi.

Prime Minister Narendra Modi aser Union Home Minister Amit Shah na lenisüba kübok küm 3 jungnüa nung peace agreement nung sign sütepogo, ta pai ashi.

N. Biren Singh-isa UNLF lennirtem, Central Committee aser MPA züngsemtem dang pelaba metetdaksü.

Manipur lendelen telungpur telok tejentiba United National Liberation Front (UNLF)-i Centre sorkar den yimjung tenangzüktep agi.

“Parnoki democratic maparen nung shilem agiba ni pelashishia agizüker. Parnoki yimjung o terenlok lenmang nung jaja

tenzüka moatsür” ta iba anogo nung Union Home Minster Amit Shah-i ashi.

UNLF ya 1964 küm tenzüka aser India telung aser bendanglen nungi maparen inyaka aru. Parnoki yimjung tenangzüktep agiba ajanga North East aser talisa Manipur nung yimjung bener arutsü imlar.

“Prime Minister Narendra Modi-i nisung ajak renloksü aser Northeast India nung lanurtem nem tarutsü tajungba agütsütsü alizüng ayuba nung iba ya tongtipang mapa ka lir” ta Amit Shah-isa metetdaksü.

Prime Minister Narendra Modi mangdang aser Union Home Minister & Minister of Cooperation Amit Shah ketdangsüba kübok 2014 nungi North East nung telungpur telok aikati sorkar den tenangzüktep agia arur.

Union Ministry of Home Affairs aser Manipur sorkar ketdangsürtem den United National Liberation Front (UNLF) lennirtemi New Delhi nung yimjung tenangzüktep nung sign sütepogo.

Meitei teloktem atema Tribunal ka tentet

Gauhati High Court nungi judge ka kübok Meitei extremist groups noktanga repringshimsü atema tribunal ka tentetogo.

Ministry of Home Affairs

(MHA)-i Gauhati High Court nung Judge Justice Sanjay Kumar Medhi dena Unlawful Activities (Prevention) Tribunal tentettsüogo.

Manipur nung Meitei Extremist Organizations aser parnok kübok teloktem ozüngi memelaba teloktem ta sangdongtsü atema kulitem iba tribunal ajanga bushitepsü.

MHA-i Meitei extremist organisations aser parnok kübok aliba telok ajak Unlawful Activities (Prevention) Act kübok küm 5 noktanga sülen anogo 15 lir yashi tribunal ka shimba osang metetdaksüogo.

MHA-i November 13 noktanga Meitei Extremist Organizations

Peoples' Liberation Army aser parnok political wing Revolutionary Peoples' Front (RPF), United National Liberation Front (UNLF) aser parnok armed wing Manipur Peoples' Army (MPA), Peoples' Revolutionary Party of Kangleipak (PREPAK) aser parnok "Red Army", Kangleipak Communist Party (KCP) aser parnok armed wing "Red Army", Kanglei Yaol Kanba Lup (KYKL), Coordination Committee (CorCom) aser Alliance for Socialist Unity Kangleipak (ASUK) den parnok kübok aliba telok ajak dena lir.

Sikkim nung December 22 nü Mega Prayer Summit alitsü

Gangtok, December 3, 2023

(Agencies): Sikkim nung aliba arogo ajak longjemer Christmas amongtsü melena December 22, 2023 nü Glacier Lake Outburst Flood bilemteta sarasadem sentong tulu ka ayongzüka agitsü.

Iba Prayer Summit nung nisung lakh 1 shi adentsü imlar.

“Tawa GLOF lendong atalokba ajanga onoki Christmas mamongtsü saka December 22, 2023 nü Paljor stadium nung

Prayer Summit ka ayonga agitsü lemtetogo. Iba atema CM P S Tamang nungi temelaba nguogo aser tanbo Sikkim nung aliba arogo ajak longjemer iba summit ayongzüktsü” ta Organising Committee president Elder PW Lepcha-i ashi.

Iba sentong nung taneptsü agütsür aser sayutsünger Paul Dinakaran-i o jembitsü aser December 22 matongdang bike rally ana alitsü, ta pai ashi.

“Sikkim nungi dang masü saka anameta aliba Darjeeling aser Kalimpong den tanga state tem nungi tamangertem iba sentong nung arua adentsü” ta Lepcha-isa metetdaksü.

Paisa state sorkar dang kümshia calendar nung enoksemstsü mepishiogo. “CM Tamang-i onok akhümtsübuba ngua pai December 22 summit nü iba osang sangoktsütsü imlar” ta Lepcha-isa shisem.

The Valor & Sacrifice Of
Mahabir Lachit Barphukan

400th
Birth anniversary of Lachit Barphukan

Assam Publication Board-i Ahom general Lachit Barphukan indang taküm otsü kaket India nung oshi 23 nung meyipzüka adoktsü. Iba kaket ya “Assam's Braveheart Lachit Barphukan” lir aser Indian English author Arup Kumar Dutta-i zülu. Assam Publication Board-i iba kaket ya oshi 23 nung meyizüker India nung nübortem nem z ü n g d a k t s ü t s ü sentong lir.



Washington nung White House jakdang Palestine nunger bhukumer temi Gaza nung tangsa ceasefire sangdongang ta takangba agüja Israel-Hamas rara nung Palestine nunger asürtem mesüka sü temesüng agi nisung aser dolls tem aleper ali nung yua aliba noksa nung angur.

Mejangjaba nisungi northern Pakistan nung nisung ti tepset

Chilas, Luchii/December 03 (Agencies): Pakistan north tsütsü Chilas jila anasa prangbong bena alirtemi bus ka amakdang yangji mena alir nisung ti asü aser nisung 20 dak tema yiru, ta ketdangsür temi ashi.

Regional government indang odongtar Muhammad Ali Johar-i ashiba agi, lendong agütsürtemi Honibar nikongdang bus nung injang khaloktsü aser yirur alirtem ya anasa aliba mozüki kati anir ao.

Asürtem rongnung sepa ana densema lir, ta Gilgit-Baltistan Police asoshi odongtar Ghulam Abbas-i osangbener dang ashi.

Iba lendong nung nisung 26 yiru aser kar injang agi yirua liasü, ta Abbas-i ashi.

Iba bus ya Karakoram Highway nung jaja liasü, koba

alima nung talangtiba lenmangtem rongnung ka lir. Nikongdang 6:30 ako meta prangbong bena alirtemi iba bus nung injang khaloktsü aser iba sülen bus ya tejaklen nungi arua aliba lorry ka den tsüktep, ta ketdangsür temi ashir.

Telok katia tang tashi iba lendong agütsüba tenüng agia mali aser iba lendong agütsüba nükjidonga memetet.

"Iba lendong agütsüba kiralongrar nem sorkari tapet temerenshi agütsütsü," ta Gilgit-Baltistan indang chief minister Haji Gulbar Khan-i sangdong ka nung ashi.

Chilas ya tenem agi sünga aliba Gilgit-Baltistan region nung Khyber Pakhtunkhwa province northwest tsütsü lir, aser yangji iba ama lendong tali ataloker aser karbo Pakistani Taliban, or Tehreek-e-Taliban

Pakistan (TTP) ajanga tenüng agia lir.

Chilas ya tourist asoshi nungtugu tesem ka lir aser iba jila anasa ya China-i yaria tzü nokdang ka tang teyangludak lir.

Linük tesem ajungalen, talisa Khyber Pakhtunkhwa aser southwestern Balochistan nung iba ama azüdokshi tali kumogo. Province anaprong ya Afghanistan den arütsüa lir.

July ita Pakistan northwest tsütsü Bajaur district nung political rally ka nung suicide bomber kati bomb pokdakja nisung 44 tepset aser 200 jungtüa yiru, ta ketdangsür temi ashir.

Taoba ita central Punjab province nung Pakistan Air Force base ka amak, saka mitkar temi takok ngua tamakertem meindoka liasü.

Ao lima Arogo tenzükba nung kü tangatetba jangjashidaksür

Tir Yimyim Adok November 11, 2023 nung ni züluba ocet nung kar metsüdakba lira, iba olenjibo ni entokadoker. 1997 küm, Mungdangi melaba ama Molungkimong Arogo Quasquicentennial aser Molungyimsen Arogo Baptism 125 Anniversary mung, anaprongla nung Tsüngrem O jembio. Ano, 2022 nung Molungkimong Arogo Sesquicentenary (SQC) aser Molungyimsen Arogo SQC nung ni oa dena liasü.

Ibai Tsüngrem O agi melaba ama ni inyakogo ta kü mulungsentsü agi agizüker.

Sd/-
Rev. L. Kari Longchar

US nung aliba Muslim nungeri Biden tsükdaksütsü nangzük

Washington, Luchii/December 03 (Agencies): Israel-i Gaza amakba nung akang-akanga nokdakba mechi United States kübok tongtipang state trok nung aliba Muslim American lenirtemi Tir Joe Biden taruba küm election nung tsükdaksütsü asoshi par kin ajungshitsü Honibarnü nangzüka liasü.

October 31 tashinung ceasefire asoshi inyakang ta Minnesota Muslim Americans temi Biden dan akhang dang #AbandonBiden campaign tenzükba liasü aser yangbo iba campaign ya Michigan, Arizona, Wisconsin, Pennsylvania aser Florida state tem nunga prokshia aor.

"Iba #AbandonBiden 2024 conference ya aruya aliba 2024 presidential election mechi tenzük aser Tir Biden-i ceasefire memolungba aser Palestine aser Israel nung tai maket nisungtem kumzükba ayutsü memolungba mechi pa meyaritsü telemtetba ya agi," ta iba telok yagi sangdong ka nung ashi.

Muslim aser Arab American nütsüngtemi anema nokdakba ya taruba election nung tir indang Electoral College asoshi tetsükdaksü asütsü.

US tir aser tatong tir ya "electors" telok kati shimer, aser parnok ya timba iba state nung political party temi shimer.

Dearborn, Michigan nung

osangbener senden ka nung Biden melentsü indang asüngdang dang, "Asenek ket nung options ana mali. Asenek options aika lir," ta Minnesota nung Council on American-Islamic Relations (CAIR) chapter indang director Jaylani Hussein-i ashi.

US politics ya party anati - Democrats aser Republicans - amokbanger lir, saka independent candidates temia tir asoshi tokteptsü akok.

Taoba mapang Harvard nung professor inyaka alisang aser pre-eminent Black philosopher Cornel West, shiba independent candidate ka ama tokteper, pai Gaza nung ceasefire alitsü akhang aser Israel-i Palestine amokbangba aija liasü. Jill Stein, shiba Green Party sapang nungi tokteper, laia Gaza nung ceasefire alitsü ashir. La ya 2016 aser 2012 nunga toktepa liasü.

Ajisüaka US yimtenren nung private donations aitba ajanga party tulu ana denya medemdangra sen ajema anguba independent candidates temi takok angutsü teimla kangabo mali.

Tang tashi US aser Israel ketdangsürtemi teti asoshi rara anentsü memolunger.

October 7 nungi tenzükba Gaza nung Palestine nunger nisung 15,207 tepsetogo aser Israel nunga nisung 1,200 tepsetogo ta ketdangsürtemi ashir.

Israel-i Qatar nungi Mossad negotiator tem jaogo

Tel Aviv, Luchii/December 03 (Agencies): Israel-i Qatar nungo Mossad negotiators tem jaogo, parnok den Egypt aser United States külemi Israel-Hamas rara maneni anena atatsü asoshi tetsüngtai ia jembia liasü.

"Yimjung ken o jembiba nung tangatetep kati maruba sülen aser Ato Kilonser Benjamin Netanyahu-i totuyuba agütsüba ama Mossad tekolakba David Barnea-i Doha nung aliba par telok Israel-i meyipa arutsü totuyuba agütsü," ta Netanyahu indang office-i Honibarnü sangdong ka nung ashi.

Gaza nung yimjung atsülangtsü jembiba nung Hamas-i par teinyaktsü meinyak, ta sangdong ajanga aitsü. Iba tezüngzüktep nungya Hamas dang tamale ashiba aser molungtepba ama Gaza nung pua aliba tetsür aser tanurtem ajunga chiooktsü liasü, ta sangdong ajanga ashi.

Ghonda ishika lir Hamas-i Gaza nung rara matem tashi Israel den pua alirtem memelenteptsü ta ashi.

"Rara matem tashi tepuokdak alir memelenteptsü ta ketdangsürtem tangatetba lir," ta Hamas indang deputy head Saleh

al-Arouri-i ashi.

"Ozü nisung (Palestine nunger) tepuokdak aliba mechiok tashi aser ceasefire ka maru tashi Israel nunger tepuokdak aliba mechioktsü."

"Israel nunger tang mechioki aliba ya sepaitem aser army nung tenzükba civilian tem lir," ta pai ashi.

Hamas ketdangsüri par linük asoshi asürtem melena Israel nunger asürtem melenteptsü renema lir ta ashi saka item tasü mang ali nungi tutettsü mapang agitsü ta ashi.

Onoki tang tashi tetsür aser tanurtem pua lir ta Israel-i ashir saka onoki parnok ajak chiokogo, ta pai ashi.

Israel aser Hamas tsüngta khen asoshi rara anena ataba tetsüngtai ia jembirtemi matsülangtetba mechi rara tenzükshi. Khen asoshi rara anena ataba mapang Israel nunger nisung 80 chiook aser iba melen Palestine nunger tepuokdak alir nisung 240 chioka liasü.

Kasa mapang France Tir Emmanuel Macron-ia Gaza nung azüdokshi tenzükba ajanga France kanga shisabolur ta ashi, shiba rara anena atatsü asoshi ano

jembishinü tenzüktsü atema Honibarnü Qatar tonga aru.

Mapang talangka ceasefire alitsü aser pua alir ajak chiooktsü asoshi tensa tajungba akumtsü nungdaker, ta Macron-i Dubai nung COP28 climate summite mapang osangbener senden ka nung ashi.

Pai Israel dang Hamas asoshi par nükjidong tejangja ashitsü ajungshia liasü.

"Israel ketdangsür temi par nükjidong tejangja ashitsüla. Hamas samatsütsü küm ter bo agitsü," ta pai ashi.

Palestine nunger takum melena region nung Israel-i security tsütsü takok mangutsü.

Tesüiba ghonda 24 tsüngta Gaza nung Palestine nunger 700 dak tema tepsetogo, ta Gaza nung aliba Director-General of the Government Media Office ajanga ashi.

October 8 nü nungi Israel nem US C-17 aircraft aser commercial airlifters amshia nok-nü agütsür.

Washington Post ajanga ashiba agi, bomb 15,000 aser artillery shells (155mm) 57,000 tayimtsü ajanga agütsüogo.

Honibarnüa Israel nungeri tayimtsü amshia Gaza Strip north

tsütsü Jabalia refugee camp nung amakdang Palestine nunger nisung 100 asü. Tekumzükter temi nisung takum alirtem bushia teka agi longsang aser jana yapoka liasü.

Hokulbarnep nungi asendenshir bomb pokloksüdang nisung 240 süogo, ta Palestine ketdangsürtemi Honibar aonung shia liasü.

Gaza City nung aliba al-Ahli Arab Hospital nung chief doctor Fadel Naim-i ashiba agi, Honibarnep nungi tang tashinung

nisung tasü mang 30 bener aruogo aser yangji tanur tenet lir.

October 7 nü rara tenzükba sülen Gaza nung nütsüng yongsük million 1.7 - yangji alir shilem 80 - pei ki yutsür tesem balala nung jenoka lir ta United Nations ajanga ashir.

Iba sülen Israel-i Gaza nung anünglen aser alilen nungi amakdang nisung 15,000 dak tema tepsetogo aser itemji timba civilian tem lir. Israel nunga Hamas-i October 7 nü amakdang nisung 1,200 tepseta liasü.



Ango ayoker ka Tagbina town, Agusan del Sur, southern Philippines nung ki ka ajanga aodang tangokba noksa nung angur. Philippines south tsütsü tzükumlen Honibarnü menoknok magnitude 7.6 anoka liasü aser Philippines ketdangsür temi tsunami adoktsü akok ta sangdongba sülen ayatirm nung yimdaklirtem pei ki yutsür tesem balalai jena ao.



Kisama nung December 3, 2023 nü Garo Cultural Troupe ajanga Jaktong Sika ta ajaba traditional game ka asayadang tangokba noksa nung angur.



Naga Heritage Village, Kisama nung December 3, 2023 nikongdang session nung Yimkhiung Cultural Troupe ajanga Humpü Jiru Pfu Thsile (tetsüng ka agi tsüngsanga asayaba) sayudang tangokba angur.

IND vs SA: Rohit aser Rahul na lenisüba nung India team asayatsü

Luchii/December 03, 2023 (Agencies): South Africa den taruba asayamung nung Rohit Sharma-i anir T20I series asayatsü aser KL Rahul lenisüba nung ODI asayatsü.

ODI asayamung atema Rohit nem anisüngzük agütsüogo. Pa lenisüba nungsa India team Test asayatsü. Hardik Pandya masayatetsüsa akümba ajanga Ajit Agarkar-i aniba selection committee-i T20 team captain asütsü asoshi Sharma shimogo.

Osang ajanga ashiba agi, Virat Kohli-i Board of Control for Cricket in India (BCCI) dang pa mapang tatsüka anisüngzüksü asoshi telemtetba agiba metetdaksüogo. South Africa semdangba mapang India team T20 internationals asem, ODI asem aser Tset asem asayatsü.

"Pai (Kohli) BCCI aser selector tem dang pa white-ball cricket asaya nungi tatsüka anisüngzükner aser pai kodang nungi asayanüdir indangji osang agütsütsü ta shiogo. Paisa,

BCCI dang pa red-ball cricket bo asayatsü ta shiogo aser iba tetezü pa South Africa den Test asaya ana atemabo shimtsü koka lir," ta source kati ashi.

Kasa mapang nung Sanju Samson ODI team nung züngoksemogo aser Rajat Patidar shiba yirur aliba tajungba kümogo, pa-a ODI team nung züngoksemogo.

Surya Kumar Yadav ODI nung masayai anisüngzüksü asoshi maongka agütsüogo, kechiyong pa tanen makai asaya arudar.

Maneni Shreyas Iyer India Test team nung züngoksemogo, ajisüka Ajinkya Rahane o Cheteshwar Pujara nabo meshim. Test nung Ajinkya melena Iyer shim kechiyong Rahane ya Iyer yiruba ajanga team nung züngoksemer liasü.

Jaspri Bumrah, Mohammed Shami, Mohammed Siraj, Shardul Thakur, Ravindra Jadeja aser R Ashwin nung ajak Indian Test team nung züngoksemogo. Kuldeep Yadav-a T20 team nung dena lir.

Asayamung mapanglem: T20I

1st T20I - December 10, 2023 at 9:30 PM IST; Kingsmead, Durban

2nd T20I - December 12, 2023 at 9:30 PM IST; St George's Park, Gqeberha

3rd T20I - December 14, 2023 at 9:30 PM IST; New Wanderers Stadium, Johannesburg

ODI

1st ODI - December 17, 2023 at 1:30 PM IST; New Wanderers Stadium, Johannesburg

2nd ODI - December 19, 2023 at 4:30 PM IST; St George's Park, Gqeberha

3rd ODI - December 21, 2023 at 4:30 PM IST; Boland Park, Paarl

Tests

1st Test - December 26-30, 2023 at 1:30 PM IST; Super Sport Park, Centurion

2nd Test - January 3-7, 2024 at 2:00 PM IST; Newlands, Cape Town.

Euro 2024: Spain, Italy aser Croatia 'group of death' nung lir

Hamburg, Luchii/December 03 (Agencies): Euro 2024 football asayamung ayonger Germany ya asayamungtenzüka Scotland den Munich nung asayatsü aser tang defending Champion Italy ya Spain den kasa telok nung ataogo.

Iba asayamung asem ben tashi koka aliba Germany nung iba asayamung ya June 14, 2024 nü Munich nung tenzüksü aser final ya July 14 nü Berlin nung aliba Olympic stadium nung asayatsü.

Group lemsaba sentong ya Honibar aonung Hamburg nung aliba Elbphilharmonie concert hall nung agia liasü, aser Germany ya Group A nung Hungary, Switzerland aser Scotland den külemi lir. Iba asayamung ya yimti ter nung asayatsü aser Hamburg ya ka lir.

Italy ya iba takok marok wazüka ayutsü asoshi mapa tasak ajurur, shirnok Group B

nung Spain, Croatia aser Albania den lir. France aser Netherlands ya ano maneni Group D nung Austria aser playoff A akoker den lir. France aser Netherlands ya qualifying round nunga kasa telok nung liasü.

Euro 2020 final nung tamakok anguba England ya Group C nung Denmark, Slovenia aser Serbia den lir.

Group E nung Belgium, Romania, Slovakia aser playoff B akoker den külemi atar aser Group F nung Portugal, Turkey, Czech Republic aser playoff C winner den atar.

Asayamung ayongba linük ya pasasa qualify asür aser European qualifiers ajanga team 20 atur. Tang tashi team asem mejangja aser parnok ya March ita playoffs nung metettsü.

Euro 2024 groups trok nungi temaba team ana-na round of 16-i 'best third-placed finishers' pezü den külemi atutsü.

73rd Senior National Basketball Championship tenzükogo



Dimapur, Luchii/December 03 (TYO): Tejangraba tulu nung 73rd Senior National Basketball Championship sentong Ludhiana, Punjab nung aliba Guru Nanak Indoor Stadium nung tenzükogo.

Iba asayamung ya Basketball Federation of India tawabangba kübok Punjab Basketball Association-i ayongzükba lir. Iba asayamung nung India kübok tesem balala nungi tebur telok 34 aser tetsür telok 30 adenshia shilem agir.

Iba asayamung nung Nagaland nungi tebur team ya Group D nung Uttar Pradesh,

Manipur, Andhra Pradesh, Himachal Pradesh, aser Chhattisgarh den lir. Kasa mapang Nagaland tetsür team ya Group D nung Rajasthan, Arunachal Pradesh, Jammu & Kashmir, Rajasthan aser Gujarat den lir.

Tanü iba asayamung nung Nagaland tetsür team ya Andhra Pradesh tetsür team den kanga meranga asaya, saka 17-25 agi tamakok ajurua liasü.

Iba sülen Nagaland nungi tebur team ya Uttar Pradesh team den asaya saka 46-79 nung tamakok ajurua asaya tembang. Iba asaya nung

captain Salew Kadete-i points 17 aser Chumbemo Kikon-i points 10 ngua asayatet.

Hombarnü asaya nung Nagaland nungi tebur team ya Manipur den Court 3 nung anepdang 10:45 ako nungi asayatsü aser tetsür team ya Jammu & Kashmir den Court 4 nung nikongdang 4:00 ako nungi asayatsü.

Basketball saburtemi iba asayamung ya Basketball Federation of India indang YouTube channel nung live reprangtetsü aser Instagram @india_basketball nunga osang angütsü.

Jharkhand state nung... (Tapak 5 nungi...)

Idangyongjisa lokti jagi pastor Sarvanan, Andrew aser Justin nung dak azük.

Iba mapang nungji pastor kinüngtsü Rosy aser Shanti nati parnok kümzüksü merangba agi tena dak-a azük, ta Andrew-isa metetdaksü.

Lokti jagi Khristantem meyong phone rakzükba den külemi gariji auya.

"Onok meyong gari nungji ki atema dang masü saka Arogo atema shishiba osetsüset aika liasü. Item ajakji parnoki auyaogo," ta paisa shisem.

Pastor Sarvanan aser Rosy na dak azükba osang angashiba sülen Rosy teno aser GEMS missionary, Vimala Johnson ilonga oa parnok semdang.

Osangbener den jembidang Vimala Johnson-i, "Temang ayang-ashiba agi küyi junga amoi mouteter. La temang telung mejungi yirua lir," ta metetdaksü.

Shanti'er yimdak aser lar kibong nung la kija Khristan lir, aser tesüiba küm asem tashi

lai Gospel Echoing Missionary Society (GEMS) Arogo nung adener.

Tesülen Hindu nung lenirtem Shanti'er kidangi oa la dang Khristan yimsü toktsür tanaben Hindu kümang, ta la rongshi. Shanti-i phone ajanga Andrew dang, "Hindu nung külem küja ka agia parnoki kangshia kü nem Hindu yimsü agizükdaksüogo," ta metetdaksü.

Shanti-isa, tang lar yimdak tensa mejungi lir ta metetdaksüba den külemi Khristantem dang police station nung ken o mebenokdaksüner, kechiyong Hindu nung anema ken o benokra parnoki lar kibong yimdak nung meindoktsü, ta metetdaksü.

Missionary Johnson-i, "Jharkhand nung Khristantem kanga reshikangshir. Tang küyi densema Khristantem anema inyakba ya densemabo tesüiba ita ana tsüngda Khristantem anema inyakba ya tang agi tatalokba pezüba lir," ta metetdaksü.

BILEMDANGANG

"Nai kechi inyakdir inyakaka alimai na repranger ama inyakang."